

ՀԱՅԱՍՏԱՆԻ ԱՈՒԴԻՏՈՐՆԵՐԻ ԵՎ ՓՈՐՁԱԳԵՏ ՀԱՇՎԱՊԱՀՆԵՐԻ ՊԱԼԱՏ  
ՈՐԱԿԱՎՈՐՄԱՆ ՀԱՄԱԿԱՐԳ

ԴԱՍԸՆԹԱՑ 2.1

ԻՐԱՎԱԳԻՏՈՒԹՅԱՆ ՀԻՄՈՒՆՔՆԵՐ

*/քննության հարցեր/*

Նոյեմբեր 2020թ.

# Բաժին Ա

*Բազմակի ընտրության 25 հարց, յուրաքանչյուր հարցի ճիշտ պատասխանը գնահատվում է 2 միավոր*

## **1. Իրավաբանական անձի հիմնադիրները.**

ա/ համապարտ պատասխանատվություն են կրում իրավաբանական անձի ստեղծման հետ կապված պարտավորությունների համար

բ/ բաժնային պատասխանատվություն են կրում իրավաբանական անձի ստեղծման հետ կապված պարտավորությունների համար

գ/ լիակատար պատասխանատվություն են կրում մինչև իրավաբանական անձի պետական գրանցումը ծագած՝ իրավաբանական անձի ստեղծման հետ կապված պարտավորությունների համար

դ/ համապարտ պատասխանատվություն են կրում մինչև իրավաբանական անձի պետական գրանցումը ծագած՝ իրավաբանական անձի ստեղծման հետ կապված պարտավորությունների համար

## **2. Ներկայացուցչություն է համարվում.**

ա/ իրավաբանական անձի գտնվելու վայրից դուրս տեղակայված նրա առանձնացված ստորաբաժանումը, որը ներկայացնում է իրավաբանական անձի շահերը և իրականացնում դրանց պաշտպանությունը

բ/ իրավաբանական անձի գտնվելու վայրից դուրս տեղակայված նրա ստորաբաժանումը, որը ներկայացնում է իրավաբանական անձի շահերը

գ/ իրավաբանական անձի առանձնացված ստորաբաժանումը, որը ներկայացնում է իրավաբանական անձի շահերը և իրականացնում դրանց պաշտպանությունը

դ/ իրավաբանական անձի գտնվելու վայրից դուրս տեղակայված նրա առանձնացված ստորաբաժանումը, որն իրականացնում է նրա բոլոր գործառույթները կամ դրանց մի մասը

## **3. Փոխանցման ակտը և բաժանիչ հաշվեկշիռը պետք է դրույթներ պարունակեն վերակազմակերպված իրավաբանական անձի.**

ա/ ակտիվների ու պարտատերերին և պարտապաններին վերաբերող բոլոր պարտավորությունների իրավահաջորդության մասին՝ ներառյալ վիճարկվող պարտավորությունները

բ/ գույքի ու պարտատերերին և պարտապաններին վերաբերող բոլոր պարտավորությունների իրավահաջորդության մասին՝ ներառյալ վիճարկվող պարտավորությունները

գ/ գույքի ու պարտատերերին և պարտապաններին վերաբերող բոլոր պարտավորությունների իրավահաջորդության մասին՝ բացառությամբ վիճարկվող պարտավորությունները

դ/ ակտիվների ու պարտատերերին և պարտապաններին վերաբերող բոլոր պարտավորությունների իրավահաջորդության մասին՝ բացառությամբ վիճարկվող պարտավորությունները

**4. Լիակատար ընկերակցությանը մասնակցելուց հրաժարվելը պետք է հայտարարվի ընկերակցությունից մասնակցի դուրս գալուց.**

- ա/ առնվազն մեկ ամիս առաջ
- բ/ առնվազն երեք ամիս առաջ
- գ/ առնվազն վեց ամիս առաջ
- դ/ ճիշտ պատասխանը բացակայում է

**5. Սահմանափակ պատասխանատվությամբ ընկերության գույքում մասնակցի բաժնեմասի վրա նրա անձնական պարտքերի համար բռնագանձում տարածել թույլատրվում է.**

- ա/ ընկերության մյուս մասնակիցների գրավոր համաձայնության դեպքում
- բ/ միայն այդ մասնակցի պարտքերը մարելու համար այլ գույքի անբավարարության դեպքում
- գ/ ընկերության մասնակիցների ընդհանուր ժողովի որոշմամբ
- դ/ առանց պայմանի

**6. Բաժնետիրական ընկերությունում ո՞ր դեպքում է պարտադիր տնօրենների խորհրդի (դիտորդ խորհուրդ) ստեղծումը.**

- ա/ երբ բաժնետերերի քանակը երեսունից ավելի է
- բ/ երբ բաժնետերերի քանակը հիսունից ավելի է
- գ/ երբ բաժնետերերի քանակը հարյուրից ավելի է
- դ/ բաժնետիրական ընկերությունը առանց նախապայմանի պարտադիր պետք է ունենա տնօրենների խորհուրդ

**7. Անբաժանելի է համարվում այն գույքը, որը.**

- ա/ չի կարող բաժանվել առանց դրա նշանակության փոփոխման կամ ենթակա չէ բաժանման օրենքի ուժով
- բ/ չի կարող բաժանվել առանց դրա նշանակության փոփոխման կամ ենթակա չէ բաժանման ՀՀ Կառավարության որոշումներով
- գ/ անհնար է հողից անջատել՝ առանց այդ գույքին կամ հողամասին վնաս պատճառելու
- դ/ չի կարող բաժանվել առանց դրա արժեքի որոշման

**8. Տեղեկատվությունը ծառայողական, առևտրային կամ բանկային գաղտնիք է, եթե.**

- ա/ այն երրորդ անձանց անհայտ լինելու ուժով ունի իրական առևտրային արժեք, չկա օրինական հիմքերով այն ազատորեն ստանալու հնարավորություն և տեղեկատվություն ունեցողը միջոցներ է ձեռնարկում դրա գաղտնիության պահպանման համար
- բ/ այն երրորդ անձանց անհայտ լինելու ուժով ունի իրական կամ հնարավոր առևտրային արժեք, թեև կա օրինական հիմքերով այն ազատորեն ստանալու հնարավորություն և տեղեկատվություն ունեցողը միջոցներ է ձեռնարկում դրա գաղտնիության պահպանման համար

զ/ այն երրորդ անձանց անհայտ լինելու ուժով ունի իրական կամ հնարավոր առևտրային արժեք, չկա օրինական հիմքերով այն ազատորեն ստանալու հնարավորություն՝ անկախ նրանից, թե տեղեկատվություն ունեցողը միջոցներ ձեռնարկում է գաղտնիության պահպանման համար

դ/ այն երրորդ անձանց անհայտ լինելու ուժով ունի իրական կամ հնարավոր առևտրային արժեք, չկա օրինական հիմքերով այն ազատորեն ստանալու հնարավորություն և տեղեկատվություն ունեցողը միջոցներ է ձեռնարկում դրա գաղտնիության պահպանման համար

**9. Ըստ ներկայացնողի արժեքուղթը, որը հավաստում է ապրանքային պահեստի կողմից ապրանքն ի պահ ընդունելը, կոչվում է.**

ա/ կոնոսամենտ

բ/ հասարակ պահեստային վկայագիր

գ/ երկակի պահեստային վկայագիր

դ/ մուրհակ

**10. Ինքնակամ կառույցի նկատմամբ ճանաչվում է այն անձի սեփականության իրավունքը.**

ա/ որը կառուցել է տվյալ ինքնակամ կառույցը

բ/ որն առաջինն է դիմել սեփականության իրավունքի ճանաչման պահանջով

գ/ որին սեփականության իրավունքով պատկանում է այն հողամասը, որի վրա գտնվում է կառույցը

դ/ որը հինգ տարվա ընթացքում բարեխղճորեն, բացահայտ և անընդմեջ տիրապետում է որպես սեփական գույք

**11. Կոչտ գրավ է համարվում այն գրավը.**

ա/ որի առարկան թողնվում է գրավատուի մոտ՝ գրավատուի փականքի տակ կամ գրավի մասին վկայող նշաններով

բ/ որի առարկան թողնվում է գրավատուի մոտ և որի նկատմամբ գրավի իրավունքը գրանցված է օրենքով սահմանված կարգով

գ/ որի առարկան թողնվում է գրավատուի մոտ՝ գրավատուի փականքի տակ կամ գրավի մասին վկայող նշաններով

դ/ որի առարկան թողնվում է գրավատուի մոտ՝ գրավատուի փականքի տակ կամ գրավի մասին վկայող նշաններով, ինչպես նաև գրավատուի մոտ թողնված գրավի առարկան կամ որի նկատմամբ գրավի իրավունքը գրանցված է օրենքով սահմանված կարգով

**12. Կեղծ է համարվում այն գործարքը, որը.**

ա/ նոտարական կարգով վավերացված չէ

բ/ կնքվել է մեկ այլ գործարքի քողարկման նպատակով

գ/ կնքվել է առերևույթ, առանց համապատասխան իրավական հետևանքներ առաջացնելու մտադրության

դ/ կնքվել է գործունակ, սակայն գործարքի կնքման պահին այնպիսի վիճակում գտնվող անձի հետ, որն ընդունակ չի եղել հասկանալու իր գործողությունների նշանակությունը կամ ղեկավարելու դրանք

**13. Եթե լիազորագրում ժամկետ նշված չէ, ապա այն ուժը պահպանում է տալու օրվանից.**

ա/ մեկ ամսվա ընթացքում

բ/ երեք ամսվա ընթացքում

գ/ մեկ տարվա ընթացքում

դ/ երեք տարվա ընթացքում

**14. Աշխատանքային պայմանագիրը համաձայնություն է աշխատողի և գործատուի միջև, ըստ որի.**

ա/ աշխատողը պարտավորվում է գործատուի անունից և նրա համար կատարել որոշակի մասնագիտությամբ, որակավորմամբ աշխատանք՝ պահպանելով աշխատավայրում սահմանված աշխատանքային կարգապահությունը, իսկ գործատուն պարտավորվում է աշխատողին տրամադրել պայմանագրով որոշված աշխատանքը, վճարել նրա կատարած աշխատանքի համար պայմանավորված աշխատավարձը և ապահովել Հայաստանի Հանրապետության օրենսդրությամբ նախատեսված աշխատանքային պայմաններ

բ/ աշխատողը պարտավորվում է գործատուի համար կատարել որոշակի մասնագիտությամբ, որակավորմամբ աշխատանք՝ պահպանելով աշխատավայրում սահմանված աշխատանքային կարգապահությունը, իսկ գործատուն պարտավորվում է աշխատողին տրամադրել պայմանագրով որոշված աշխատանքը, վճարել նրա կատարած աշխատանքի համար պայմանավորված աշխատավարձը և ապահովել Հայաստանի Հանրապետության օրենսդրությամբ, այլ նորմատիվ իրավական ակտերով, կոլեկտիվ պայմանագրով, կողմերի համաձայնությամբ նախատեսված աշխատանքային պայմաններ

գ/ աշխատողը պարտավորվում է գործատուի համար կատարել որոշակի մասնագիտությամբ, որակավորմամբ աշխատանք՝ պահպանելով աշխատավայրում սահմանված աշխատանքային կարգապահությունը, իսկ գործատուն պարտավորվում է աշխատողին տրամադրել պայմանագրով որոշված աշխատանքը և ապահովել Հայաստանի Հանրապետության օրենսդրությամբ, այլ նորմատիվ իրավական ակտերով, կոլեկտիվ պայմանագրով, կողմերի համաձայնությամբ նախատեսված աշխատանքային պայմաններ

դ/ աշխատողը պարտավորվում է գործատուի համար կատարել որոշակի մասնագիտությամբ, որակավորմամբ աշխատանք՝ իր հայեցողությամբ պահպանելով աշխատավայրում սահմանված աշխատանքային կարգապահությունը, իսկ գործատուն պարտավորվում է վճարել նրա կատարած աշխատանքի համար պայմանավորված աշխատավարձը և ապահովել Հայաստանի Հանրապետության օրենսդրությամբ, այլ նորմատիվ իրավական ակտերով, կոլեկտիվ պայմանագրով, կողմերի համաձայնությամբ նախատեսված աշխատանքային պայմաններ

**15. Նշվածներից որը չի համարվում աշխատանքի էական պայման.**

ա/ աշխատանքի վայրը

բ/ պաշտոնի անվանումը

գ/ աշխատաժամանակի (աշխատանքի և հանգստի) ռեժիմը

դ/ կազմակերպության կազմակերպարավական ձևը

**16. Աշխատողն իրավունք ունի աշխատանքային պայմանագրի լուծման մասին ծանուցումը հետ վերցնելու առանց գործատուի համաձայնության.**

ա/ ոչ ուշ, քան այն ներկայացվելու օրվանից հետո՝ երեք աշխատանքային օրվա ընթացքում

բ/ ոչ ուշ, քան այն ներկայացվելու օրվանից հետո՝ երեք օրվա ընթացքում

գ/ ոչ ուշ, քան այն ներկայացվելու օրվանից հետո՝ հինգ աշխատանքային օրվա ընթացքում

դ/ ոչ ուշ, քան այն ներկայացվելու օրվանից հետո՝ տասն օրվա ընթացքում

**17. Աշխատաժամանակի առավելագույն տևողությունը, ներառյալ՝ արտաժամյա աշխատանքը, չի կարող անցնել.**

ա/ օրական 8 ժամից (հանգստի և սնվելու համար՝ ընդմիջումը ներառյալ), իսկ շաբաթվա ընթացքում՝ 40 ժամից

բ/ օրական 10 ժամից (հանգստի և սնվելու համար՝ ընդմիջումը ներառյալ), իսկ շաբաթվա ընթացքում՝ 60 ժամից

գ/ օրական 12 ժամից (հանգստի և սնվելու համար՝ ընդմիջումը ներառյալ), իսկ շաբաթվա ընթացքում՝ 48 ժամից

դ/ օրական 12 ժամից (հանգստի և սնվելու համար՝ ընդմիջումը ներառյալ), իսկ շաբաթվա ընթացքում՝ 60 ժամից

**18. Աշխատանքային տարում, որի համար տրամադրվում է ամենամյա արձակուրդ, չեն ներառվում.**

ա/ աշխատողի ժամանակավոր անաշխատունակության ժամանակահատվածը

բ/ վճարովի ամենամյա արձակուրդի ժամանակահատվածը

գ/ օրինական գործադուլի ժամանակահատվածը

դ/ չվճարվող արձակուրդի ժամանակահատվածը

**19. Կարգապահական տույժը.**

ա/ չի կարող բողոքարկվել աշխատողի կողմից

բ/ կարող է բողոքարկվել գործատուին՝ տվյալ կարգապահական տույժը կիրառելու մասին իրավական ակտն օրենքով սահմանված կարգով ուժի մեջ մտնելուց հետո՝ հինգ աշխատանքային օրվա ընթացքում

գ/ կարող է բողոքարկվել դատական կարգով՝ տվյալ կարգապահական տույժը կիրառելու մասին իրավական ակտն օրենքով սահմանված կարգով ուժի մեջ մտնելուց հետո՝ մեկ ամսվա ընթացքում

դ/ կարող է բողոքարկվել դատական կարգով՝ տվյալ կարգապահական տույժը կիրառելու մասին իրավական ակտն օրենքով սահմանված կարգով ուժի մեջ մտնելուց հետո՝ երեք ամսվա ընթացքում

**20. Նշված պնդումներից որն է ճիշտ.**

ա/ լիցենզիան տրվում է միայն լիցենզավորման ենթակա գործունեության յուրաքանչյուր տեսակի համար

բ/ լիցենզիան տրվում է լիցենզավորման ենթակա գործունեության բոլոր տեսակների համար միաժամանակ

գ/ լիցենզիան տրվում է լիցենզավորման ենթակա գործունեության տվյալ խմբի բոլոր տեսակների համար

դ/ լիցենզիան տրվում է բացառապես լիցենզավորման ենթակա գործունեության տվյալ դասի յուրաքանչյուր տեսակի համար

**21. Որոշակի ժամկետով կամ որոշակի պայմաններով լիցենզավորված անձին լիցենզավորման ենթակա գործունեությունը կամ այդ գործունեության առանձին գործառույթները կամ լիցենզիայով վերապահված առանձին գործողություններն իրականացնելու իրավունքից ժամանակավորապես զրկումը կոչվում է.**

ա/ լիցենզիայի հայտի մերժում

բ/ լիցենզիայի գործողության կասեցում

գ/ լիցենզիայի գործողության դադարեցում

դ/ լիցենզիայի վերաձևակերպում

**22. Բաժնետիրական ընկերության հիմնադիր ժողովն իրավագոր է, եթե դրան մասնակցում են տեղաբաշխված բաժնետոմսերի սեփականատերերի ձայների, ինչպես նաև բաժնետերերի.**

ա/ 1/2-ը

բ/ 2/3-ը

գ/ 3/4-ը

դ/ 4/5-ը

**23. Բաժնետիրական ընկերության տարեկան ժողովը գումարվում է կանոնադրությամբ սահմանված ժամկետներում, բայց ոչ ուշ, քան Ընկերության հերթական ֆինանսական տարվա ավարտից հետո.**

ա/ մեկ ամսվա ընթացքում

բ/ երկու ամսվա ընթացքում

գ/ երեք ամսվա ընթացքում

դ/ վեց ամսվա ընթացքում

**24. Միատեսակ փաստական հանգամանքների նկատմամբ (եթե առկա չէ դրանց տարբերական որևէ հիմք), վարչական մարմինների կողմից անհավասար մոտեցում ցուցաբերելու սահմանափակումը վերաբերում է.**

ա/ վարչարարության համաչափությանը

բ/ կամայականության արգելքին

գ/ հայեցողական լիազորությունների սահմանափակմանը

դ/ առավելագույնի սկզբունքին

**25. Նշվածներից ո՞րը վարչական վարույթի փուլ չէ.**

ա/ հարուցման փուլ

բ/ նախաքննության փուլ

գ/ ընթացիկ փուլ

դ/ եզրափակիչ փուլ

Ընդամենը 50 միավոր



# ԲԱԺԻՆ Բ. ԲՈԼՈՐ ԽՆԴԻՐՆԵՐԸ ՊԱՐՏԱԴԻՐ ԵՆ

## Խնդիր 1 /12 միավոր/

«ՏԱՅՎ ՏՐԵՆԴՍ» ՓԲԸ-ի (Ընկերություն) կանոնադրական կապիտալի թվով 90 բաժնետոմսերը սեփականատերերի միջև բաշխված են հետևյալ կերպ.

Արմեն Արարատյան – 10 բաժնետոմս  
Բաբկեն Բագրատունի – 8 բաժնետոմս  
Գաբրիել Գասպարյան – 30 բաժնետոմս  
Դավիթ Դեմիրճյան – 22 բաժնետոմս  
Եղիշե Եփրեմյան – 20 բաժնետոմս

2020 թվականի փետրվարի 27-ին տեղի է ունենում Ընկերության բաժնետերերի տարեկան ընդհանուր ժողովը, որին մասնակցում են Ընկերության բոլոր բաժնետերերը՝ բացառությամբ Եղիշե Եփրեմյանի, ով երկրում չլինելու պատճառով չի կարողանում մասնակցել ժողովի աշխատանքներին, սակայն օրենքով սահմանված կարգով լիազորագիր է տալիս Դավիթ Դեմիրճյանին՝ ժողովում իր շահերը ներկայացնելու համար:

Օրակարգային առաջին հարցի՝ Ընկերության տարեկան հաշվետվության ներկայացման ժամանակ Ընկերության տնօրենը նշում է, որ Ընկերության ակտիվները կազմում են 5.2 մլրդ. ՀՀ դրամ, ընթացիկ տարվա գուտ շահույթը՝ 617 մլն. ՀՀ դրամ: Գործունեության մանրամասն ներկայացումից պարզ է դառնում, որ 2019թ. դեկտեմբերի 23-ին 535 մլն. ՀՀ դրամ հաշվեկշռային արժեքով Ընկերության արտադրական № 2 մասնաշենքը 575 մլն. ՀՀ դրամով վաճառվել է Ընկերության խորհրդի նախագահի որդուն: Այս փաստը վրդովեցնում է Ընկերության բաժնետեր Բաբկեն Բագրատունուն, ով ժողովի ժամանակ հարցնում է, թե արդյոք առկա է անկախ գնահատողի եզրակացություն վաճառված անշարժ գույքի շուկայական արժեքի վերաբերյալ: Ի պատասխան հարցադրմանը՝ Ընկերության տնօրենը տեղեկացնում է, որ գործարքը կնքվել է ՀՀ օրենսդրության պահանջներին համապատասխան, գործարքի վերաբերյալ դրական եզրակացություն է ներկայացրել Ընկերության խորհուրդը, և քվեարկությանը խորհրդի նախագահը՝ որպես շահագրգռվածություն ունեցող անձ, չի մասնակցել, իսկ ինչ վերաբերում է եզրակացությանը, ապա անկախ գնահատողի եզրակացության կարիք չի եղել, քանի որ անշարժ գույքը վաճառվել է հաշվեկշռային արժեքից ավելի բարձր արժեքով: Բաբկեն Բագրատունին իր ելույթում նշում է, որ Ընկերության խորհրդի նախագահը փաստացի չարաշահել է բաժնետերերի վստահությունը, իր պաշտոնական դիրքն օգտագործելով ներազդել է խորհրդի մյուս անդամների վրա և ի վնաս Ընկերության՝ հոգուտ իր որդու ապօրինի գործողություններ է իրականացրել: Նա նշում է, որ ժողովը պետք է համապատասխան որոշում ընդունի՝ չեղարկելու նշյալ գործարքը:

Գործարքի չեղարկման օգտին քվեարկում են Բաբկեն Բագրատունին և Դավիթ Դեմիրճյանը:

Օրակարգի հաջորդ հարցի՝ Ընկերության խորհրդի անդամների ընտրության ժամանակ Դավիթ Դեմիրճյանն առաջարկում է լուծարել խորհուրդը, որպեսզի հետագայում բացառվեն նախորդ հարցի քննարկման ժամանակ բացահայտված չարաշահումները: Արմեն Արարատյանը նշում է, որ բաժնետիրական ընկերությունների համար խորհուրդ ունենալն օրենսդրության պահանջ է, ուստի իրենք հնարավորություն չունեն լուծարել կառավարման այդ մարմինը: Բաբկեն Բագրատունին ասում է, որ ինքն անձամբ պետք է անպայման լինի խորհրդի կազմում և պնդում է, որ որպես Ընկերության բաժնետեր, խորհրդի կազմում պետք է ընդգրկվի առանց քվեարկության:

**Հարց 1. Քննարկեք Ընկերությանը պատկանող արտադրական № 2 մասնաշենքի վաճառքի օրինականությունը՝ անդրադառնալով Բաբկեն Բագրատունու և Ընկերության տնօրենի բերած փաստարկներին:**

/5 միավոր/

**Հարց 2. Իրավունք ունե՞ր արդյոք Ընկերության ժողովն արտադրական № 2 մասնաշենքի վաճառքի գործարքը չեղարկել: Քվեարկության արդյունքում ի՞նչ որոշում կայացվեց:**

/2 միավոր/

**Հարց 3. Ներկայացրեք Ընկերության խորհրդի առնչությամբ Դավիթ Դեմիրճյանի և Արմեն Արարատյանի տեսակետների իրավական հիմնավորվածությունը: Արդյո՞ք Բաբկեն Բագրատունին իրավունք ունի առանց քվեարկության ընդգրկվել խորհրդի կազմում:**

/5 միավոր/

## Խնդիր 2 /10 միավոր/

«ԱՐՖ ԳՐՈՒՊ» ՍՊԸ-ի (Ընկերություն) աշխատակից Վաղինակ Արմենակյանը 2006 թվականի մայիսի 1-ից աշխատում է ընկերությունում, ընդ որում 2009 թվականի նոյեմբերի 1-ից՝ որպես արտադրամասի պետ: 2020 թվականի փետրվարի 12-ին Ընկերության մի խումբ աշխատակիցներ Ընկերության տնօրենին տեղեկացնում են, որ արտադրամասի պետ Վաղինակ Արմենակյանն աշխատավայրում գտնվել է ոչ սթափ վիճակում, իր ենթակայությամբ աշխատող անձանց վիրավորել է և դրսևորել ոչ պատշաճ վարքագիծ: Գործարանի տարածքի տեսահսկման համակարգի միջոցով իրականացված ձայնագրությունների վերծանման արդյունքում անվտանգության աշխատակիցները պարզում են աշխատակիցների խոսքերի ճշմարտացիությունը և համապատասխան ձայնագրությունը տրամադրում են տնօրենին: Ձայնագրությունից պարզ երևում է, թե ինչպես է Վաղինակ Արմենակյանը արտադրամասում ցուցաբերում ոչ պատշաճ վարքագիծ, իսկ դրանից մոտ մեկ ժամ առաջ էլ ընդմիջման ժամին՝ ծածուկ կերպով օգտագործում օղի:

Ընկերության տնօրենի հետ զրույցում Վաղինակ Արմենակյանը սկզբում հերքում է իր՝ աշխատավայրում ոչ սթափ վիճակում գտնվելու հանգամանքը՝ պնդելով, որ որևէ ոգելից խմիչք չի օգտագործել, իսկ աշխատակիցների հետ իր կոպիտ խոսելը բխել է բացառապես աշխատանքային կարգապահությունը պահպանելու նկատառումներից ելնելով, որպեսզի վերջիններս առավել զգոն լինեն և սխալներ թույլ չտան: Սակայն ձայնագրությունը տեսնելուց հետո հասկանում է, որ հերքելն անիմաստ է և ընդունում է իր մեղքը՝ նշելով, որ իր կինն առողջական լուրջ խնդիրներ ունի, գտնվում է հիվանդանոցում, ուստի ընկճված հոգեվիճակը թեթևացնելու նպատակով է աշխատանքի վայրում օղի օգտագործել: Վաղինակ Արմենակյանը խնդրում է ներել իրեն և հնարավորություն տալ հետագա արդյունավետ աշխատանքով նպաստել Ընկերության գործունեության զարգացմանը:

Ընկերության տնօրենը նշում է, որ ինքն այլևս չի հավատում Վաղինակին և վերջինիս ազատում է աշխատանքից՝ աշխատողի նկատմամբ վստահությունը կորցնելու հիմքով: Վաղինակ Արմենակյանը դիմում է դատարան Ընկերության տնօրենի՝ իրեն աշխատանքից ազատելու հրամանը չեղյալ համարելու պահանջով: Վաղինակ Արմենակյանը հայցադիմումում վկայակոչել է հետևյալ փաստարկները.

ա/ Ընկերության տնօրենը, իմանալով ոգելից խմիչք օգտագործելու պատճառները, այդուհանդերձ դրսևորել է ոչ մարդասիրական վերաբերմունք: Որպես ապացույց՝ հայցադիմումին կցվել է բժշկական տեղեկանք, որում նշված է, որ Վաղինակ Արմենակյանի կինը՝ Արփի Պապիկյանը, 2020 թվականի փետրվարի 8-ից գտնվում է վերակենդանացման բաժանմունքում, անգիտակից վիճակում և որ հիվանդի վիճակը գնահատվում է ծայրահեղ ծանր:

բ/ Ընկերության տնօրենը, առանց նկատողություն կամ խիստ նկատողություն կարգապահական տույժ կիրառելու, միանգամից արձակել է ազատման հրաման:

գ/ Ինքը չի ծանուցվել աշխատանքից ազատման մասին:

դ/ Ինքն ունի Ընկերությունում աշխատանքի ավելի քան 10 տարվա աշխատանքային փորձ, և 2017 թվականին արգասաբեր աշխատանքի համար արժանացել է Ընկերության լավագույն աշխատակցի պատվոգրին:

**Հարց 1. Արդյո՞ք Ընկերության տնօրենի գործողությունները համապատասխանում են ՀՀ աշխատանքային օրենսդրության պահանջներին:**

**/4 միավոր/**

**Հարց 2. Գնահատե՞ք Վաղինակ Արմենակյանի հայցադիմումում վկայակոչված փաստարկների հիմնավորվածությունը:**

**/6 միավոր/**

### Խնդիր 3 /10 միավոր/

«ՀԵՓԻ ՄԱՆՔԻ» սահմանափակ պատասխանատվությամբ ընկերությունը (Ընկերություն) զբաղվում է տնտեսական ապրանքների ներմուծմամբ ու վաճառքով և հաճախակի մասնակցում է պետական գնումների մրցույթների: Գործունեության ընթացքում Ընկերությունը պարբերաբար ունենում է հավելյալ շրջանառու միջոցների ներգրավման կարիք: Բացի այդ, մատակարարումն առավել արդյունավետ կազմակերպելու նպատակով, Ընկերությունը նախատեսում է ձեռք բերել նոր բեռնատար մեքենա, ինչպես նաև ստանալ բանկային երաշխիքներ՝ պետական գնումների գործընթացին մասնակցելու համար: Նշված ֆինանսական ռեսուրսների անբավարարության խնդիրը լուծելու համար Ընկերությունը դիմում է «ՎԻԹԻ ԿԱՊԻՏԱԼ ԲԱՆԿ» ՓԲԸ-ին (Բանկ): Բանկը դիտարկում է Ընկերության հայտը, գնահատում վարկունակությունը և նշում, որ բացի Ընկերության հաշվեկշռում առկա երեք բեռնատար մեքենաների գրավը, անհրաժեշտ է նաև մեկ անձի երաշխավորություն: Ընկերության տնօրեն և միակ մասնակից Գոռ Վերանյանը դիմում է իր մանկության ընկեր Վաղինակ Ապրեսյանին (ով որպես անհատ ձեռնարկատեր զբաղվում է ժամանցային միջոցառումների կազմակերպմամբ)՝ խնդրելով հանդես գալ որպես երաշխավոր: Վաղինակ Ապրեսյանը համաձայնում է օգնել ընկերոջը:

Արդյունքում՝ Բանկի և Ընկերության միջև 14.01.2020թ. կնքվում է թիվ 007 գլխավոր վարկային պայմանագիրը, որով Բանկը պատրաստակամություն է հայտնում Ընկերությանը տրամադրել մինչև 25,000,000 (քսանհինգ միլիոն) ՀՀ դրամ ընդհանուր գումարով վարկեր, վարկային գծեր, օվերդրաֆտներ և բանկային երաշխիքներ:

Նույն օրը՝ 14.01.2020թ., 5 տարի մարման ժամկետով կնքված 25,000,000 (քսանհինգ միլիոն) ՀՀ դրամի թիվ 141-007/Վ վարկային պայմանագրով նախատեսված պարտավորությունների (վարկի մայր գումարի, տոկոսների և դրանց ուշացման համար նախատեսված տույժերի և տուգանքների) կատարման ապահովման համար Բանկի, Ընկերության և Ա/Ձ Վաղինակ Ապրեսյանի միջև կնքվում է թիվ 007/Ե երաշխավորության պայմանագիրը, համաձայն որի Ա/Ձ Վաղինակ Ապրեսյանը պարտավորվում է պատասխանատվություն կրել 14.01.2020թ. կնքված թիվ 007 գլխավոր վարկային պայմանագրով Ընկերության ստանձնած պարտավորությունների համար՝ սեփականության իրավունքով իրեն պատկանող ամբողջ գույքով, բոլոր բանկերում սպասարկվող հաշվարկային, ընթացիկ, արտարժույթային, ավանդային և այլ հաշիվներին առկա գումարներով: Թիվ 007/Ե երաշխավորության պայմանագրով ամրագրվում է նաև, որ երաշխավորությունը գործում է մինչև պարտավորությունների ամբողջական կատարումը:

Վարկի ներգրավումից երեք օր անց՝ 17.01.2020թ., պարզվում է, որ բեռնատար մեքենայի ձեռքբերման համար նախապես պայմանավորված գինն ավելացել է և անհրաժեշտ է ներգրավել լրացուցիչ ևս 1,000,000 (մեկ միլիոն) ՀՀ դրամ, ինչի կապակցությամբ էլ այդ օրը Բանկի և Ընկերության միջև կնքվում է թիվ 141-007/Վ վարկային պայմանագրին կից համաձայնագիր, համաձայն որի Ընկերությանը տրամադրվում է անհրաժեշտ 1,000,000 (մեկ միլիոն) ՀՀ դրամ վարկը:

Երկու ամիս անց՝ նոր կորոնավիրուսային տեսակի համավարակով պայմանավորված, Ընկերության իրացման ծավալները կտրուկ նվազում են, ինչի հետևանքով Ընկերությունը չի կարողանում իր վարկային պարտավորությունները պատշաճ կատարել, ժամանակին և ամբողջ ծավալով իրականացնել վարկային պայմանագրով նախատեսված վճարումները: Բանկը ծանուցում է Ընկերությանը (Վարկառուին) և Ա/Ձ Վաղինակ Ապրեսյանին (Երաշխավորին)՝ պարտավորությունները վաղաժամկետ և ամբողջությամբ կատարելու պահանջի մասին՝ տալով տասնօրյա ժամկետ: Գոռ Վերանյանը սկսում է խուսափել իր մանկության ընկեր Վաղինակ Ապրեսյանի հետ հանդիպումներից՝ չպատասխանելով նույնիսկ նրա հեռախոսազանգերին:

Բանկը դիմում է դատարան՝ Վարկառուից և Երաշխավորից համապարտության կարգով վարկի մայր գումարն ու տոկոսները, ինչպես նաև տույժերն ու տուգանքները (ընդհանուր՝ 24,980,000 ՀՀ դրամ) բռնագանձելու պահանջով: Երաշխավոր Ա/Ձ Վաղինակ Ապրեսյանն առարկում է հայցի դեմ, ինչին ի պատասխան՝ դատարանը որոշում է կայացնում բռնագանձում տարածել միայն Վարկառուի գույքի վրա:

**Հարց 1. Դատարանն ի՞նչ հիմնավորմամբ կարող էր Ա/Ձ Վաղինակ Ապրեսյանի առարկությունը բավարարել և վերջինի գույքի վրա բռնագանձում չտարածել:**

**/4 միավոր/**

**Հարց 2. Ներկայացրեք երաշխավորության էությունը՝ որպես պարտավորությունների կատարման ապահովում:**

**/6 միավոր/**

#### Խնդիր 4 /10 միավոր/

Սևակ Ավագյանը մասնագիտությամբ շինարար է և պատվերով իրականացնում է շինարարական աշխատանքներ: Մասնագիտական գիտելիքների և աշխատանքին բժախնդիր վերաբերմունքի շնորհիվ տարիների ընթացքում ձեռք է բերում լավ շինարարի համբավ և մշտապես պատվերներ է ունենում: 2015 թվականի հուլիսի 11-ին իր ընկերներ Հովհաննես Թամամյանի և Ավետիք Իսկոյանի հետ հանդիպման ժամանակ պատմում է, որ շինարարական տեխնիկայի բավական մեծ պահանջարկ կա, և որ բազմաթիվ ընկերություններ վարձակալում են իրենց անհրաժեշտ շինարարական տեխնիկան: Ուստի շինարարական տեխնիկա գնելը և վարձակալությամբ այն հանձնելը բավականին եկամտաբեր է: Այս միտքը հետաքրքրում է ընկերներին և որոշում են իրենց խնայողությունների հաշվին համատեղ ձեռք բերել վերամբարձ կռունկ՝ 60 մլն. ՀՀ դրամով: Ընկերներից յուրաքանչյուրը ներդնում է 20 մլն. ՀՀ դրամ՝ ձեռք բերելով 33.33% կռունկի նկատմամբ բաժնային սեփականության իրավունք: Ինչպես և նախապես պլանավորվել էր՝ Սևակն իր կապերի շնորհիվ կարողանում է կռունկը վարձակալության հանձնել տարբեր ընկերությունների, ինչի արդյունքում ինքը՝ ընկերների հետ միասին, վաստակում են կայուն գումար:

2019 թվականի հոկտեմբերի 7-ին շինարարական հրապարակում տեղի ունեցած դժբախտ պատահարի արդյունքում Սևակ Ավագյանը մահանում է: Օրենսդրության համաձայն՝ նրա ժառանգ են ճանաչվում կինը՝ Սվետլանա Ավագյանը և երկու որդիները՝ Տիգրանը և Տրդատը: Արդյունքում վերամբարձ կռունկի՝ Սևակ Ավագյանին պատկանող բաժնեմասը ժառանգությամբ անցնում է Սվետլանային, Տիգրանին և Տրդատին: Քանի որ Սևակ Ավագյանի ընտանիքը նրա մահից հետո գտնվում է սոցիալական բարդ իրավիճակում՝ Սվետլանան, Տիգրանը և Տրդատը որոշում են իրենց բաժինները վաճառել: 2020 թվականի փետրվարի 2-ին Սվետլանան իր երկու որդիների հետ իրենց բաժինները վաճառելու մտադրության մասին գրավոր ծանուցում են Սևակի ընկերներին՝ որպես վաճառքի ընդհանուր գին նշելով 12 մլն. ՀՀ դրամ: Ի պատասխան ծանուցման՝ Հովհաննես Թամամյանը հինգ օր անց հայտնում է, որ քանի որ ինքը ժամանակ չունի գույքի վարձակալությամբ հանձնելու հետ կապված հարցերով զբաղվելու, 2019 թվականի դեկտեմբերի 26-ին իր բաժնեմասը պարտքի դիմաց զիջել է քաղաքացի Վահագն Արշակյանին: Կռունկի մյուս սեփականատեր Ավետիք Իսկոյանը ծանուցմանը պատասխանում է, որ ինքը ուզում է շարունակել տեխնիկայի վարձակալման հանձնման բիզնեսը և պատրաստ է գնել Սևակի ընտանիքին պատկանող բաժնեմասը, սակայն կարծում է, որ 12 մլն. ՀՀ դրամը գերազանահատված է, ուստի առաջարկում է 8.5 մլն. ՀՀ դրամ: Մի քանի օր անց Ավետիք Իսկոյանն իմանում է, որ Հովհաննես Թամամյանն իր բաժնեմասը պարտքի դիմաց զիջել է այլ անձի, վրդովված լինելով Հովհաննեսի գործողություններից, պահանջում է որպեսզի վերջինս քայլեր ձեռնարկի բաժնեմասի նկատմամբ սեփականության իրավունքը դրամական փոխհատուցման դիմաց իրեն փոխանցելու ուղղությամբ, հակառակ դեպքում սպառնում է, որ կդիմի դատարան Հովհաննեսի և Վահագնի միջև կնքված գործարքն անվավեր ճանաչելու պահանջով՝ հիմք ընդունելով այն, որ բաժնեմասն օտարվել է՝ առանց իր և մյուս սեփականատերերի համաձայնության: Ի պատասխան դրան՝ Հովհաննեսը նշում է, որ ինքը չի կարող կատարել Ավետիքի պահանջը:

Ավելին՝ որևէ մեկից համաձայնություն ստանալու որևէ պարտավորություն չի ունեցել, քանի որ խոսքը վերաբերում է ոչ թե անշարժ գույքի, այլ շարժական գույքի բաժնեմասի օտարման, հետևապես գործարքն իրականացվել է ՀՀ օրենսդրության պահանջներին համապատասխան:

**Հարց 1. Բնութագրեք բաժնային սեփականության մասնակիցներից յուրաքանչյուրի գործողությունների իրավաչափությունը: Ի՞նչ քայլեր կարող է ձեռնարկել Ավետիք Իսկոյանը վերամբարձ կռուսկի 100 տոկոս բաժնեմասն ունենալու համար:**

/4 միավոր/

**Հարց 2. Բնութագրեք ընդհանուր սեփականության ծագման հիմքերն ու բաժնային սեփականության ներքո գտնվող գույքը տիրապետելու, տնօրինելու և օգտագործելու իրավական կարգավորումները: Սեփականության իրավունքի դադարման ինչպիսի՞ հիմքեր են նախատեսվում օրենսդրությամբ:**

/6 միավոր/



## Խնդիր 5 /8 միավոր/

«ԲԻԳ ԲԻԼԴԻՆԳ» փակ բաժնետիրական ընկերությունն (Ընկերություն) իրականացնում է բազմաբնակարան շենքի կառուցապատում Երևան քաղաքի Արհեստագործների փ. 11/1 հասցեում: Ընկերությունը կառուցվող շենքի բնակարանների վաճառքի պայմանագրերի կնքման իրավունքը գործակալական հիմունքներով փոխանցում է անշարժ գույքի առուվաճառքի գործունեություն իրականացնող «ԳՈԼԴ ԱՓԱՐԹՄԵՆԹ» սահմանափակ պատասխանատվությամբ ընկերությանը: Ընկերության և «ԳՈԼԴ ԱՓԱՐԹՄԵՆԹ» ՍՊԸ-ի միջև կնքվում է գործակալության պայմանագիրը: Գործակալության պայմանագրով ամրագրվում է, որ գործակալը պարտավորվում է վարձատրությամբ պրինցիպալի հանձնարարությամբ, պրինցիպալի անունից և նրա հաշվին կատարել ք. Երևան, Արհեստագործների փ. 11/1 հասցեում կառուցվող բազմաբնակարան շենքի բնակարանների վաճառքի նախնական և վերջնական պայմանագրերի կնքման և դրանցից բխող անհրաժեշտ այլ իրավաբանական գործողություններ: Պայմանագրով գործակալին տրվում է վերը նշված գործողությունների կատարման համար անհրաժեշտ բոլոր լիազորությունները: Որպես գործակալական վարձատրություն սահմանվում է գնորդներից հավաքագրված գումարների 10%-ը:

2018թ. ապրիլի 10-ին «ԳՈԼԴ ԱՓԱՐԹՄԵՆԹ» ՍՊԸ-ն քաղաքացի Կիրակոս Վշտունու հետ կնքում է նախնական պայմանագիր նշված բազմաբնակարան շենքի 7-րդ հարկում գտնվող 78 քմ. մակերեսով թիվ 22 բնակարանը 33 մլն. ՀՀ դրամով վաճառելու վերաբերյալ: Պայմանագրի համաձայն՝ Կիրակոս Վշտունին պայմանագրի կնքման օրը որպես կանխավճար վճարում է բնակարանի արժեքի 40 տոկոսը՝ 13.2 մլն. ՀՀ դրամ, իսկ մնացած գումարը պարտավորվում է վճարել շենքը շահագործման հանձնելուց հետո 30 օրվա ընթացքում:

2019թ. սեպտեմբերի 1-ին Ընկերության գործունեությունը ֆինանսավորող առևտրային բանկը 200 մլն. ՀՀ դրամ 4 ամիս ժամկետանց պարտավորությունների համար դիմում է դատարան՝ Ընկերությանը սնանկ ճանաչելու պահանջով: Դատարանը բավարարում է բանկի ներկայացրած հայցը, և Ընկերությունը 2019թ. դեկտեմբերի 15-ին դատարանի որոշմամբ ճանաչվում է սնանկ: Սնանկության մասին տեղեկատվությունը շենքի այլ գնորդներից իմանալուն պես, Կիրակոս Վշտունին դիմում է «ԳՈԼԴ ԱՓԱՐԹՄԵՆԹ» ՍՊԸ-ին՝ գործարքի հետագա ճակատագիրը հասկանալու համար: «ԳՈԼԴ ԱՓԱՐԹՄԵՆԹ» ՍՊԸ-ի տնօրեն Վռամ Իշխանյանը տեղեկացնում է, որ իրենք ընդամենը միջնորդ կազմակերպություն են և ունեն կնքված գործակալության պայմանագիր սնանկ ճանաչված Ընկերության հետ, ուստի և չեն կարող պատասխանատվություն կրել իրենց գործընկերոջ ֆինանսական խնդիրների պատճառով: Վռամ Իշխանյանը Կիրակոս Վշտունուն ասում է, որ վճարված 13.2 մլն. ՀՀ դրամի ընդամենը 10%-ն է եղել իր կազմակերպության եկամուտը և ավելացնում, որ ցավում է տեղի ունեցածի համար, և որ ինքն ու իր կազմակերպությունը որևէ բանով նրան օգնել չեն կարող: Վռամ Իշխանյանը նաև նշում է, որ Կիրակոս Վշտունին, իմանալով կառուցապատող Ընկերության սնանկության գործընթացի վերաբերյալ, պետք է ավելի վաղ իր պահանջը ներկայացներ դատարան՝ պարտատերերի ընդհանուր ցուցակում ընդգրկվելու նպատակով: Ու քանի որ դա էլ չի կատարվել, պետք է համակերպվի տեղի ունեցածի հետ: Կիրակոս Վշտունին ասում է, որ անպայման դիմելու է դատարան՝ իր կրած վնասների փոխհատուցման պահանջով:

Ավելին՝ նա նշում է, որ անշարժ գույքի շուկայում բնակարանների գները բարձրացել են, և ինքը նույնանման բնակարանն այլևս չի կարող գնել 33 մլն. ՀՀ դրամով, այլ՝ առնվազն 40 մլն. ՀՀ դրամով, ուստի և այդ 7 մլն. ՀՀ դրամի տարբերությունը ևս՝ որպես պատճառված վնաս, պահանջելու է «ԳՈԼԴ ԱՓԱՐԹՄԵՆԹ» ՍՊԸ-ից:

Կիրակոս Վշտունին դիմում է դատարան՝ «ԳՈԼԴ ԱՓԱՐԹՄԵՆԹ» ՍՊԸ-ից պահանջելով 20.2 մլն. ՀՀ դրամ՝ որպես վճարված 13.2 մլն. ՀՀ դրամ գումարի և պատճառված 7 մլն. ՀՀ դրամ վնասի փոխհատուցում:

**Հարց 1. Դատարանը կընդունի՞ արդյոք «ԳՈԼԴ ԱՓԱՐԹՄԵՆԹ» ՍՊԸ-ի դեմ Կիրակոս Վշտունու հայցը: Պատասխանը հիմնավորել:**

/4 միավոր/

**Հարց 2. Նկարագրեք խնդրի հանգուցալուծումը՝ նշելով թե 2 ընկերություններն ու քաղաքացի Կիրակոս Վշտունին ինչ փոխադարձ պահանջներ կարող են ներկայացնել միմյանց նկատմամբ:**

/4 միավոր/

Ընդամենը 50 միավոր